

# Pol-ate kaapiya tu yuuh la vu hil bel-ate vu Tesalonika

---

**1** <sup>1</sup>“Sa Pol-ande Silvenes ayuuh Timoti, waay kaavu kaapiyaa-jo laas vu ham bel-ate vu Tesalonika sen ham atu Aamangg Anutu yuuh Omaaho Bop Yesu Kalisi-te hil lung laa-to. <sup>2</sup><sup>b</sup>Aamangg Anutu yuuh Omaaho Bop Yesu Kalisi lambiing samu samu naas mando gaving ham-ambe ham alompayo nanjip melaas.

## Pol pêêlis la vu Anutu

<sup>3</sup>“Halingg-aso, hey oo naapêêlis nala vu Anutu nalak busin pin in ham. Manyinjo nivasa in ham awii-having osin ham pin oo ahem naving mango-so be navu naatu bopaata jak, <sup>4</sup><sup>d</sup>ondeey hey oo natee hey lak in ham vu Anutu-te hil bel-ate lu ti ti, de hey naanêêl vu sil nambe hil vaalu dawiiing nindanjeen vu ham lôôt-ambe ham naaku nimeen ngeeyaata, le ma de ham oo awii-having keen om ham naale niwêêk lôôt.

## Yesu le nom-ambe bu nyevahaan vu omaahonôôn

<sup>5</sup>“Ham naale niwêêk-anja yoo taato nambe Anutu le bu nyevahaan anivalok vu yiyi, de ham naaku nimeen-anja in nambe ham ambiing Anutu haale jak, ond Anutu le naanêêl naambe ham alohvu om ham andukana mando gaving yi. <sup>6</sup><sup>f</sup>Anutu le biing va nivalok naambêênjo naambe yoo le bu nimeen nyevahaan dokanaah vu hil sen davu nimeen vu ham-ato, <sup>7</sup><sup>g</sup>tombe le nôôh nimeen sen natovu ham-ato na, de bu sawaasin naavi kuusin-ate vu yiyi. Anutu le biing naambêênjo hôôk busin sen Omaaho Bop Yesu le taato yi naam langaah gaving yite angela niwêêk-aso vu baandonii-to. <sup>8</sup><sup>h</sup>De le naam hôôk kin mala bopaata lopayo,

---

<sup>a</sup> 1:1 1Tes 1:1   <sup>b</sup> 1:2 Lom 1:7   <sup>c</sup> 1:3 1Tes 1:2-3; 2Tes 2:13   <sup>d</sup> 1:4 2Ko 7:4; 1Tes 2:19; Taato 1:9   <sup>e</sup> 1:5 Pil 1:28   <sup>f</sup> 1:6 Lom 12:19; Taato 18:6-7   <sup>g</sup> 1:7 Mat 25:31; 1Tes 3:13; 1Tes 4:16   <sup>h</sup> 1:8 Saam 79:6; Ais 66:15; Jer 10:25; Lom 2:8; 1Pi 4:17

tombe le bu nyevahaan vu hil sen sil doosin Anutu, osin hil sen nanyend doos in yate Omaaho Bop Yesu-te banye nivasaa-to. <sup>9</sup>Hil-anju ond sil e gako nipaya nyevahaan naambe le lana mend nama valok-ate in Omaaho Bop ame osin yite melangaah bopaata niwêêk-ate. <sup>10</sup>Vaa-jo le dôôk busin sen Kalisi nom-ato, de Anutu-te hil vaambuung e daatu yite hil anikaapulis, de hil pin sen londpayo la timu vu yii-to ond sil e kand vasa lôôt vu yi. Ond yik ham e naambêênju gaving in ham awii-having Anutu-te vakasin sen hey aanêêl vu ham-ato.

### Pol lohak in Anutu bu niwêêk vu hil Tesalonika

<sup>11</sup><sup>k</sup>Om nambêênja hey naalohak lak busin pin in ham, de hey kataangg vu yate Anutu in biing-ambe ham anohvu va sen yoo teey ham in-ato. De va nivasa sen ham alompayo wiingin nambe ham ambiing-ato, osin ham awii-having om ham nawiing kul, ond Anutu biing osin yite niwêêk-ambe vaa-jo nôôn jak keen. <sup>12</sup><sup>l</sup>Nambêênja ham e gako yate Omaaho Bop Yesu Kalisi haale jak, de le gako ham haalem jak. Le biing naambêênjo jak yuuh Manganaan Anutu-te samu samu.

### Omaaho kalêêsin ambu-te vakasin

**2** <sup>1</sup><sup>m</sup>Halingg-aso, vakasin sen lak yate Omaaho Bop Yesu Kalisi nom-ambe naasupin yiyi anaah vu yii-to, ond hey kataangg ham naambe <sup>2</sup>ham-ame kam yu-yuuh pavis-ambe ham naham jak in vakasin sen hil vaalu danêêl nambe, Omaaho Bop-ate busin sen nom-ato lung laa-jo. Mak hil vaalu yoo lanêêl vakasin sen-anjo, me mak lanêêl vakasin-anjo nambe sen sil danêêl Anutu-te vakasin langaah keen, me hil vaalu yoo lanêêl malis amu nambe hey oo kaavu kaapiyaa-ja, le ma. <sup>3</sup><sup>n</sup>Om ham ganggin ham in hil vaalu me-tatuhin ham in vati le. In busin-anju me-le naam pavis e, de hil pin e ahend kalin-ambe galuuh damind vu Anutu naamunggin, osin omaaho kalêêsin danggakook e taato yi naam langaah. Omaahôô-ju le gako nipaya valok-ate. <sup>4</sup><sup>o</sup>De le nyiis ngaamong in nambe daanggôôl va sen hil danêêl nambe silate Anutuu-to osin va vaambuung pin, de yoo le gako yi jak-ande baake va pin-anjo gato, de guli-na mando hôôk Anutu-te dumb vaambuung alo be naanêêl naambe, “Soo timu Anutu.”

<sup>5</sup>Vakasin-anja sa nando having ham bôôy-ambe saanêêl-ato ond ham akam-ame navu mava? <sup>6</sup>Tonde va sen naale omaaho kalêêsin danggakook-ate mop jeen gêên ond ham alak ni, de omaaho kalêêsin danggakook-ate busin sen naam-ato ond mem le taato yi langaah.

<sup>i</sup> 1:9 Ais 2:10,19,21    <sup>j</sup> 1:10 Kol 3:4; 1Tes 3:13    <sup>k</sup> 1:11 Kol 1:9; 1Tes 1:2-3    <sup>l</sup> 1:12 Ais 24:15; Mal 1:11    <sup>m</sup> 2:1 1Tes 4:13-17    <sup>n</sup> 2:3 1Ti 4:1; 1Jon 2:18; 4:3; Jon 17:12    <sup>o</sup> 2:4 Dan 11:36; Esi 28:2

7De omaaho kalêêsin danggakook monawiing kul kaatokin, om yoo monambiing naambêênju be mando, de omaaho sen naale yite mop jeen-ato na vêêl e, <sup>8</sup>p<sup>8</sup>mem omaaho kalêêsin danggakook e taato yi naam langaah, tombe Omaaho Bop Yesu le nyiis ak aviloos-ambe jimb.

Yik Omaaho Bop Yesu le naam osin yite melangaah atombe le kawiiy omaaho kalêêsin danggakook-ambe na valok-ate. <sup>9</sup>q<sup>9</sup>Omaaho kalêêsin danggakook-anju le naam osin Saalang-ate niwêêk, tombe le biing taahu taahu niwêêk vaha vaha osin tatuhin. <sup>10</sup>Tombe sim yite tatuhin anipaya pin e palapin hil sen le lana mend namaa-to, in dangga nambe hil-anju nind baya de me-ahend having vakasin keen e, om Anutu me-hôôvu sil e. <sup>11</sup>r<sup>11</sup>Om Anutu yoo le bu kakook tatuhin osin niwêêk vu sil in nambe sil lambiing gaving vakasin tatuhin. <sup>12</sup>In nambe hil sen me-lawii-having vakasin keen e, de ahend having va nipaya lôôt-ato, ond Anutu le naanêêl-ambe sil gako nipaya nyevahaan.

### **Anutu holin ham lung la nambe le nôôh ham vêêl**

<sup>13</sup>s<sup>13</sup>Halingg-aso, hey oo naapêêlis la vu Anutu lak busin pin in ham sen Omaaho Bop ahe naving ham-ato, in Anutu yoo holin ham-ambe lôôh ham vêêl in va nipaya munggin hil pin, ond wiing nambêênjo lak Vavi Vaambuung sen nawiing-ambe ham natu yite hil anivalok-ato, osin lak sen ham nawii-having vakasin keen-ato. <sup>14</sup>Ondeey Anutu teey ham lak banye nivasa sen hey aanêêl vu ham-ato, in nambe yate Omaaho Bop Yesu Kalisi le bu yite nikaapulisi vu ham. <sup>15</sup>Om halingg-aso, ham oo baale niwêêk-ande ham naapuvu tanasin sen hey aanêêl vu ham, de vaalu hey kaavu hôôk kaapiyaa-to.

<sup>16</sup>Yate Omaaho Bop Yesu Kalisi de Aamangg Anutu sen ahe having yiyi osin wiing samu samu vu yiyi, tonde yoo navu kaandu yalonggpaya danggata osin danggata, be mem yiyi natung mengg in yite nôôn anivasa baandonii-to, <sup>17</sup>t<sup>17</sup>ond kaandu ham alompaya lôôt, de bu niwêêk vu ham in ham ambiing va pin osin ham naanêêl va nivasa pin.

### **Ham anohak in Anutu dôôvu hey**

**3** <sup>1</sup>u<sup>1</sup>Ke halingg-aso, sa naanêêl vu ham naambe, ham anohak in Anutu dôôvu hey-ande Omaaho Bop-ate vakasin na nohvu taaku pin pavis-ambe hil pin gako jak naambe sen ham bôôy-ato. <sup>2</sup>Hil ngeeyaata me-lawii-having Anutu le, om ham oo anohak vu Anutu in gilin hey in hil anipaya osin hil sen dawiiing va danjeen-ato. <sup>3</sup>v<sup>3</sup>Lemu Omaaho Bop-ame le gavuuham e, nganjo le kaandu ham-ande ganggin ham in nambe

<sup>p</sup> 2:8 Iyop 4:9; Ais 11:4; Taato 19:15    <sup>q</sup> 2:9 Mat 24:24; Taato 13:11-13    <sup>r</sup> 2:11 2Ti 4:4

<sup>s</sup> 2:13 2Tes 1:3; Jon 15:16; Ep 1:4; 1Tes 4:7; 5:9    <sup>t</sup> 2:17 1Tes 3:13    <sup>u</sup> 3:1 1Tes 5:25

<sup>v</sup> 3:3 1Tes 5:24

omaaho nipaya Saalang-ame daandiiy ham e. <sup>4</sup> \*Omaaho Bop vêêl hey akang ak, om hey aawii-having nambe va pin sen hey aanêl vu ham nambe ham ambiing-ato ond ham nawiing, tonde ham oo le monambing.

<sup>5</sup> Hey aawiingin nambe Omaaho Bop gatongin ham alompayo be ham akam oo monambu Anutu-te ahe havingin, be ham baale niwêêk naambe sen Kalisi naale niwêêk-ambe vaaku nimeen-ato.

### Hil pin oo lambiing kul

<sup>6</sup> \*Halingg-aso, hey naanêl vu ham jak yate Omaaho Bop Yesu Kalisi haale naambe ham ganggin ham in omaaho ango sen nind baya kul-ande me-davu taamuyin tanasin sen hey naanêl vu ham-ato le. <sup>7</sup> \*Ham oo alak ni nambe ham sapa hôk hey vahangg ond mem nivasa, in hey nando having ham-ato ond hey-ame nando malis e.

<sup>8</sup> \*Hey-ame hako vanôn ayuuh ame malis hôk ham namam e, yik hey oo vaanggo, de hey oo aawiing kul aniwêêk lak hey namangg langaah-ande busin in nambe hey-ame aambu kul bopaata vu ham e. <sup>9</sup> \*Hey aawiing nambênjo, ond me-nambe sen hey haalengg ma om ham-ame ambaat hey e, malis, nganjo hey aawiing in nambe ham angge be ham taamuyin. <sup>10</sup> <sup>b</sup>De hey nando having ham ond hey aanêl vakasin vu ham nambe omaaho ti nambe me-biing kul e, ond me-ja vanôn e. <sup>11</sup> \*Lemu gêen hey hangoyin-ande hamate hil vaalu me-dawiing kul ti le, yoo deep paling amu, de sil oo mondakaas in hil ango-te va yuuh ame. <sup>12</sup> <sup>d</sup>Hil nambênja hey naanêl tanasin vu sil jak Omaaho Bop Yesu Kalisi haale naambe sil mando nivasa de lambiing kul osin niwêêk in yoo daatovu silate vanôn nivalok.

<sup>13</sup> \*Lemu halingg-aso, ham oo ambiing va nivasa jak busin pin, de ham-ame nimtambo jak e. <sup>14</sup> <sup>f</sup>De naambe omaaho ti nanye doos in vakasin sen hey kaavu lokaneep hôk kaapiyaa-jo, ond ham oo anjak ni de ham-ame bakaas gaving yi le, ond mem le ninaamum in va sen wiing-anjuuto. <sup>15</sup> \*Lemu ham-ame angge yi paya lôôt e, nganjo ham ambu kôôvu yi naambe sen ham navu kôôvu ham halim keen-ato.

### Vakasin ahus

<sup>16</sup> <sup>h</sup>Ham mando nivasa me ham mando osin nimeen ayuuh ame, ond Omaaho Bop sen vakasin melaas danggakook-ato yoo bu yite vakasin melaas naas mando gaving ham jak busin pin. Ke, om Omaaho Bop mando gaving ham pin.

\* 3:4 2Ko 7:16; Gal 5:10; 1Tes 4:10 \* 3:6 Mat 18:17; Lom 16:17 \* 3:7 Pil 3:17; 1Tes 1:6

z 3:8 1Tes 2:9 a 3:9 1Ko 9:4; 1Tes 1:6 b 3:10 1Tes 4:11 c 3:11 1Ti 5:13 d 3:12 1Tes 4:11

e 3:13 Gal 6:9 f 3:14 1Ko 5:9,11 g 3:15 1Tes 5:14 h 3:16 1Tes 5:23

<sup>17</sup><sup>i</sup>Sa Pol, yik soo namangg kaavu vakasin ahus dakaajo be sa lavangg hôôk ham. Sate kaapiya pin ond yoo ni nambêênjo pin, soo navu kaavu nambêênjo pin.

<sup>18</sup>Yik vakasin lung laaja. Yate Omaaho Bop Yesu Kalisi-te samu samu naas mando gaving ham pin.

---

<sup>i</sup> 3:17 1Ko 16:21